

दिनांक : 03.02.2026

समय : 18.45 बजे

आकाशवाणी जयपुर—अजमेर

प्रादेशिक समाचार

- प्रधानमंत्री नरेन्द्र मोदी अमरीका सागे भारत रा ऐतिहासिक व्यापार समझौता ने धीरज रो नतीजो बतायो।
- प्रधानमंत्री जनता ऊं 6 फरवरी ने परीक्षा पे चर्चा कार्यक्रम देखण री अरज कीनी।
- मुख्यमंत्री भजनलाल शर्मा भाजपा विधायक दल री मीटिंग मांय मंत्रियां अर विधायकां ने सदन री कार्यवाही मांय सक्रिय रेहवण सारु प्रेरित कीना।
- राज्य मांय आवता स्थानीय निकाय चुनावां सारु राजस्थान अर मध्यप्रदेश राज्य निर्वाचन आयोग बीचे खास करार।

000

प्रधानमंत्री नरेन्द्र मोदी कह्यो है के अमरीका सागे भारत रो ऐतिहासिक व्यापार समझौतो लगातार धीरज राखण रो नतीजो है। वे आज एनडीए रा सांसदां री मीटिंग मांय बोल रह्या हा। श्री मोदी कह्यो के ओ करार एक अनुकूल माली वातावरण बणावण सागे विश्व स्तर माथे कारोबार ऊं जुड़ी चर्चावां रा बारा मांय सरकार रा सुसंगत अर संतुलित नजरिया ने बतावे है। वे कह्यो के विपख टैरिफ री आलोचना कीनी, पण सरकार धीरज राख्यो, जिण रो नतीजो अब साफ़ निजर आ रह्यो है। प्रधानमंत्री कह्यो के दुनिया री व्यवस्था बदल रही है अर आ तेजी ऊं भारत री ओर झुक रही है। राज्यसभा मांय सदन रा नेता अर केंद्रीय मंत्री जे.पी. नड्डा भारत—अमरीका व्यापार शुल्क री जाणकारी री मांग रा बारा मांय कांग्रेस समेत विपख री आलोचना कीनी। सदन मांय विपख री ओर ऊं करी ज्या हंगामा पाछे श्री नड्डा कह्यो के सरकार भारत अर अमरीका बीचे व्यापार समझौता रा बारा मांय सदन मांय विगतवार चर्चा सारु तैयार है।

000

लोकसभा मांय विपख रा आठ सदस्यां ने अनुशासनहीनता रा आरोप मांय बजट सत्र रा बाकी हिस्सा सारु निलंबित कर दिया ज्या है। आं मांय कांग्रेस रा मणिकम टैगोर, अमरिंदर सिंह राजा, गुरजीत सिंह औजला, हिबी ईडन, डीन कुरियाकोस, प्रशांत पडोले, किरण कुमार रेड्डी अर सी.पी.आई.—एम. रा एस. वेंकटेशन शामिल है। आज दोपहरां पाछे 3 बज्यां लोकसभा री कार्यवाही ओजू सरु व्हेवण परां ई विपख रा सदस्य न्यारा—न्यारा मुद्दां माथे खिलाफत सरु कर दीनी। पीठासीन अधिकारी सांसदां रा अनुशासनहीन व्यवहार माथे आपत्ति जतायी ई पाछे संसदीय कार्य मंत्री किरन रिजिजू लोकसभा मांय अनुशासनहीन आचरण अर गलत व्यवहार करण वाळा सांसदां ने बजट सत्र री बाकी अवधि सारु निलंबित करण रो प्रस्ताव रख्यो, जिण ने सदन ध्वनि मत ऊं पास कर दीनो। ई पाछे अध्यक्ष सदन री कार्यवाही काल संवारे 11 बज्यां ताई टाळ दीनी।

000

प्रधानमंत्री नरेन्द्र मोदी रो विद्यार्थियां, वां रा मायतां अर अध्यापकां सागे बातचीत रो खास कार्यक्रम परीक्षा पे चर्चा शुक्रवार ने व्हेला। श्री मोदी जनता ऊं ओ कार्यक्रम देखण री अरज कीनी है। सोशल मीडिया पोस्ट रे जरिये प्रधानमंत्री कह्यो के मोट्यारां सागे बातचीत करणो ऊर्जा देवण वाळो रह्यो। वे इम्तिहान देवण वाळां विद्यार्थियां ऊं बिना तनाव परीक्षा देवण, चुनौतियां रो सामो करण सारु व्यावहारिक तरीका काम लेवण, तालमेल बणावण अर खुद माथे भरोसो बधावण माथे जोर दीनो। परीक्षा पे चर्चा कार्यक्रम रा बारा मांय विद्यार्थियां मांय ई घणो उमाव निजर आ रह्यो है। श्रीगंगानगर जिला मांय सादुल शहर रा विद्यार्थी वां रा विचार यों बताया।

000

सुप्रीम कोर्ट व्यवस्था दीनी है के तकनीकी कंपनियां डेटा साझाकरण रा नाम माथे जनता रा निजता रा हक ऊं खिलवाड़ नी कर सके है। भारतीय प्रतिस्पर्धा आयोग-सीसीआई रा हुकम रे खिलाफ मेटा अर व्हाट्सएप री अपील री सुनवाई करता थकां अदालत आ व्यवस्था दीनी। आयोग आं कम्पनियां री निजता री नीति ने ले र वां माथे 213 करोड़ रुपया ऊं जुर्मानो लगायो हो।

000

मुख्यमंत्री भजनलाल शर्मा आज विधानसभा भवन मांय भाजपा विधायक दल री मीटिंग ने सम्बोधित कीना। वे कह्यो के केंद्रीय बजट मांय करी ज्या प्रावधानां ऊं प्रदेश रो विकास तेज व्हेला। श्री शर्मा खास तौर रेलवे रा हलका सारु राजस्थान बाबत् राख्यी ज्या 10 हजार करोड़ रुपया रो जिकर कीनो। वे कह्यो के सैर-सपाटा, कारखाना अर आईटी सरीखा हलकां मांय बजट रा प्रावधानां ऊं राज्य री ई बरकत व्हेला। मीटिंग रे दौरान मुख्यमंत्री कह्यो के गांवां रा विकास माथे सरकार रो खास ध्यान है अर ई सारु ग्राम उत्थान शिविर लगाया जा रह्या है।

000

खाद्य अर नागरिक आपूर्ति मंत्री सुमित गोदारा आज विधानसभा मांय कह्यो के घरेलू गैस री टंकियां रो बेजा इस्तेमाल अर गैर-कानूनी तरीका ऊं टंकियां भरण ने रोकण सारु लगातार कार्रवाई करी जा रही है। वे कह्यो के होटलां, ढाबां अर ब्याह-सावां री ठौड़ां रसोई गैस काम लेवण री नियमित जांच करी जा रही है। श्री गोदारा बतायो के जिला स्तर माथे कलेक्टर कानी ऊं बणायी ज्यी टीमां लगातार जांच कर रही है।

000

राज्य मांय आवता स्थानीय निकाय चुनाव सारु राजस्थान अर मध्यप्रदेश रा राज्य निर्वाचन आयोग बीचे आज जयपुर मांय एक खास करार माथे सही करीजी। करार रा तैत मध्यप्रदेश राज्य निर्वाचन आयोग राजस्थान राज्य निर्वाचन आयोग ने 30 हजार कंट्रोल यूनिट अर 60 हजार बैलेट यूनिट भाड़ा माथे मुहैया करावेला। राज्य रा निर्वाचन आयुक्त राजेश्वर सिंह आ जाणकारी दीनी। वे बतायो के अ ईवीएम नगर निकाय अर पंचायती राज संस्थावां रा चुनाव मांय काम ली जावेला।

000

झुंझुनू मांय आज प्रधानमंत्री विश्वकर्मा योजना रो फायदो लेवण वाळां सारु माल बेचण अर कारोबार रा बारा मांय एक दिन री कार्यशाला राख्यी ज्यी। इण मांय कारीगरां ने सामान री ऑनलाइन बिक्री अर डिजिटल मार्केटिंग री जाणकारी दीरीजी। कार्यशाला मांय जीएसटी रजिस्ट्रेशन अर बैंकिंग सुबीता सरीखा मुद्दां माथे ई चर्चा करीजी। एमएसएमई रा उपनिदेशक अजय शर्मा कह्यो के योजना रो फायदो लेवण वाळां री आमदनी बधावण सारु वां ने केवल कौशल ताई सीमित नी राख र बाजार ऊं जोड़बो जरूरी है।

000

बूंदी मांय राख्यी ज्या एशियन वाटर बर्ड सेंसेज 2026 मांय पाणी रा जिनावरां री गिणती करीजी। तीन दिन रा ई अभियान रा तैत जिला री 16 खास वेटलैंड ठौड़ां सर्वे करी ज्यो, जिण मांय जेतसागर झील, राम सागर, फूल सागर अर गोठड़ा बांध माथे पाणी रा जिनावरां री गिणती करीजी। ई दौरान 145 भांत रा देसी-परदेसी परिन्दां री ठा पड़ी। बूंदी रा जिला वन अधिकारी आलोक नाथ गुप्ता बतायो के गिणती रा काम मांय ई-बर्ड एप ई काम लीरीजी।

000

विमुक्त, घुमन्तू अर अर्द्धघुमन्तू समुदाय सारु चलाया जा रह्या पहचान पत्र सहायता शिविरां री मियाद 15 फरवरी ताई बधा दीरीजी है। सामाजिक न्याय मंत्री अविनाश गहलोत आ जाणकारी दीनी। वे

बतायो के हाल ताई ई-मित्र रे जरिए 10 हजार 700 ऊं बत्ती अर्जियां मिली है, ज्यां मांय ऊं 5 हजार 300 ऊं बत्ता लोगां ने सर्टिफिकेट दे दिया ज्या है।

000

सामाजिक न्याय अर अधिकारिता विभाग री ओर ऊं सामाजिक सुरक्षा पेंशन लेवण वाळां सारू बैंक खाता री जाणकारी अपडेट करावणो जरूरी कर दियो ज्यो है। पेंशन लेवण वाळां ज्या लोगां रा खाता पैली बड़ौदा राजस्थान क्षेत्रीय ग्रामीण बैंक मांय हा, वां ने अब राजस्थान ग्रामीण बैंक मांय नुवो खातो खुला र बैंक कोड अपडेट करावणो व्हेला। आ जाणकारी ई-मित्र रे जरिये जन आधार कार्ड मांय जुड़ायी जा सके है। ई सागे ई पेंशन पोर्टल माथे जाणकारी अपडेट करावण सारू संबंधित एसडीओ या विकास अधिकारी रा दफ्तर मांय अर्जी देवणी व्हेला। जो पात्र लोग सालाना सत्यापन नी करायो है, वे ई-मित्र रे जरिए उंगलियां रा निशान रे मार्फत सत्यापन करा सके है।

000

प्रदेश मांय हाल ताई 42 लाख 95 हजार ऊं बत्ती एम.एस.एम.ई इकाइयां पंजीकृत व्हे गयी है। आं उद्योगां ने 55 हजार करोड़ रुपया ऊं बत्ती रकम री ऋण गारंटी मदद दीरीजी है। भाजपा रा प्रदेश अध्यक्ष अर राज्यसभा रा सदस्य मदन राठौड़ रा एक सवाल रा जवाब मांय आज राज्यसभा मांय आ जाणकारी दीरीजी। जवाब मांय बतायी ज्यो के हाथ री कारीगरी अर कपड़ा उद्योग ने बधावो देवण सारू राज्य मांय 16 क्लस्टर बणायी ज्या है।

000

भरतपुर मांय पंच गौरव कार्यक्रम रा तैत शहद बणावण ने बधावो देवण सारू आज सिखावण शिविर लगायी ज्यो। कृषि वैज्ञानिक सेवर अर भुसावर हलका रा किसानां ने शहद री गुणवत्ता, भेळो करण अर बाजार मांय बेचण रा बारा मांय जाणकारी दीनी। शिविर मांय बतायी ज्यो के शहद 15 ऊं 16 डिग्री सेल्सियस तापमान माथे जम जावे है, जो वां री कुदरती खासियत है।

000

जोधपुर नगर निगम शहर ने रूपाळो बणावण सारू भीतां माथे कलात्मक मांडणा मंडावणो सरू कीनो है। स्वच्छ भारत अभियान रा तैत पुणे रा वास्तुकला संस्थान रा विद्यार्थी भीतां माथे राजस्थानी कला अर साफ-सफाई ऊं जुड़्या फोटो बणा रह्या है। नीला रंग री पृष्ठभूमि माथे संस्कृति री झलक उकेरी जा रही है, ताकि परदेसी सैलानियां ने ई राजस्थान री विरासत री जाणकारी मिल सके।

000